



# Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 3

Yangia anidakangma :



Tir Yimym



tir\_yimym



tir yimym

TAPAK 7

**Arvind Kejriwal melena Atishi  
Delhi chief minister inyaktsü**

**Netanyahu-i rara nukjidong  
ulushiba sangdong**



VOL. XXI ISSUE NO. 336 (ADOK 336) DIMAPUR RASEMNU (WEDNESDAY) RONGJUI (SEPTEMBER) 18, 202 ₹ 5.00

## Nagaland nung Congress shia arutsü meranger; State ajungalen akangshitsü

**Kohima, September 17, 2024 (TYO):** Nagaland nung MLA ka danga meliaka Lok Sabha election nung takok anguba nung ajemdaker Congress-i tesüiba nung ama tanaben wangshitsü atema state ajungalen mapa ka tenzüksü aser iba ya 2028 state general election atema renemba maparen asütsü.

"Nagaland nung Congress party atema 2024 Lok Sabha election ya ajungmesor ka liasü. MLA ka danga meliaka party candidate S. Supongmeren Jamir-i takok angu. Iba ajanga nübertemi temelenshi tajung aginüba sayur aser iba jagi parnoki Congress nem vote enoktsü" ta Nagaland atema AICC secretary i/c Christopher Tilak-i ashi.

Tilak ya Tripura, Manipur aser Sikkim nunga AICC Secretary in-charge lir aser pai iba mapa agizüker tanga mezüng atema state pezü semdanga senzür. Pai Tripura aser Manipur semdangba sülen Deobarnü Nagaland tonga aru.

"Taruba itatem nung onoki Nagaland ajungalen districts aser Assembly levels asoshi asalentong tajung ka renemtsü imlar" ta Tilak-i ashi.

2003 nungi Nagaland nung Congress-i sorkar akümtsüsa jenjang menguteti aru aser 2015 nungibo Congress MLA ajak Naga Peoples' Front nung adenba sülen MLA ka danga mali dang arur.



**Nagaland atema AICC Secretary in-charge Christopher Tilak den Lok Sabha MP Supongmeren Jamir aser Congress ketdangpurtem Congress Bhavan, Kohima nung osangbener senden ka nung külemi agiba noksa angur.**

Nagaland Pradesh Congress Committee (NPCC) President Supongmeren den ketdangpurtem Eastern Nagaland nungi tenzükter district ajunga sema senzüksü aser civil societies den ajurutepa jenjang ajak nung party akangshitsü ta Tilak-isa metetdaksü.

Pai anogo ananü amongdang sanen luden senden ka amen aser party tanishirtem den sensaksemogo ta paisa ashi.

Nagaland nung rongsenketzüng khuret den lanur mapa manguba aser tetsürtem dak sendakba tebilemstütem asoshi inyaktsü nungdaker. Külen state renloksü aser tejakleni aotsü atema yimjung alitsü kanga tongtipang ta Tilak-i ashi.

AICC Secretary in-charge Tilak-isa Naga Political Issue atema

jembidang Congress MP aser party ketdangpur asem tashi state sorkari tentetba Political Affairs Committee (PAC) nung züngsemba atema pelaba metetdaksü.

"PAC tentetba ya mapa tajung ka lir saka PAC nung züngsema aliba ama Naga teloktem aser Centre tsüngda agreements ana nung sign sütepa Congress nem agütsüsüla. PAC-i mapa tuluba inyaknür aser civil societies nungi tebilemba aginür saka parnok nem agreements agütsüsüla kechiyong ibaji azüng nung dang jangjatsü" ta Tilak-i ashi.

Sorkari agreements ana ya yimjak nung sayu nungbo iba ajanga nübertemi osang tajungba metettsü aser interlocutor ka den dang masü saka nisung aika den olemtep tajungba litettsü ta paisa ashi.

2013-14 mapang Congress sorkar alidang Centre-i NSCN-IM den preliminary agreement nung sign sütep saka iba sülen sorkar melenba ajanga mapa inyaka moutet. Ajisüaka kasa tangatetba nung Framework Agreement sign sütepogo, ta paisa metetdaksü.

"Onoki sorkar ketdangsütsü tashi ngura Naga yimten tebilemstü ya teti atema tembanga angatetteptsü" ta AICC Secretary in-charge Tilak-isa nenshia ashi.

Osangbenertemi "One Nation One Election" atema asüngdangdang "iba ya democracy ka anema lir. India ya champion democracy lir aser sorkar shingaiya ONOE mebenoktetsü kechiyong iba ya democracy anema lir" ta NPCC president Supongmeren Jamir-i

langzü.

"Iba ya NDA-i tanga tebilemstütem miimbangsü atema political asayamenü ka aiba dang lir" ta AICC secretary Tilak-isa Supongmeren pusema ashi.

Centre, ENPO aser Nagaland sorkartem tsüngda Frontier Nagaland Territory atema olemtep timi angatetteptsü imlar ta Supongmeren-isa ashi.

MP election nung takok tulu ngur urban body elections nung Congress-i takok tajung mengutetba atema langzüdang "Nagaland nung MLA ka danga meliaka Congress-i municipal elections nung menden 8 nung takok nguogo aser iba ya tetenzük tajung ka lir" ta pai ashi.

"Taruba küm pezü tsüngda onoki teküpoktiba jenjang nung lua mapa inyaktsü aser 2028 elections nung takok tajung angutsü imlar" ta Supongmeren-isa ashi.

Sainik School Punglwa nung lisopurtem mazüngba atema MP Supongmeren-i tebilemstü abenba ka lemsatetp.

"Sainik School Punglwa nung Nagaland atema menden 120 mekazüka lir aser entry period ji Class 6 & 9 atema lir. Ajisüaka tang Naga nung kaketshir 80 dang lir aser menden 40 tazüng lir aser Centre-i reserved seats agientsü tsüba bilemer. Anungji Naga nungertemi pei tanurtem Sainik School nung züngdaksütsü mepishir" ta pai ashi.

## Swacchta Hi Seva campaign tenzükogo



**Kohima, September 17, 2024 (TYO):** Linük den külemi Nagaland nunga Mongulbarnü Swachhra Hi Seva campaign tenzükogo.

"Urban Local Bodies aser Village Councils den public-i iba mapa nung yariteptsü aser takok ngudaktsütsü mepishir" ta Public Health Engineering Department Principal Secretary E. Mhombemo Patton-i ashi.

Iba ya 10 buba Swachhra Hi Seva lir aser merükmejutsüba ya ajak tebilemstü ta osang prokshio go ta pai ashi.

Swacchta Hi Seva ajanga merükmejutsü aser temang anepalutsü osang prokshir. Iba mapa ya loktii inyaker aser taküm atema "Swabhav Swachhata, Sanskar Swacchta" omen shima lir ta Urban Development Department and Municipal Affairs Commissioner & Secretary Kekhrievor Kevichusa-ia ashi.

"Taküm campaign atema Nagaland nung inyakyim tasen asem tenzüksü aser 'Moi laga jabrah, moi laga kaam' (mny waste, my responsibility) yimym agütsüsü. Nagaland nung Konyak nung September 28 nü Lao-Ong-Mo festival adopt asütsü aser iba anogo nung loktii tetsüng lenmang aser yimdongtem merüka jajar" ta Kevichusa-isa ashi.

"Nagaland campaign steering committee-isa November 30 tashi Swachhata campaign atsülangtsü lemtetogo. Iba ya Hornbill Festival tenzükba den tembangtsü aser October o November ita anogo ananü lokti nübodoka mapa inyaktsü" ta pai ashi.

Nagaland sorkar department ana- Urban Development aser PHE ajanga urban areas 39 aser rural areas 23 nung black spots 189 jangjateta lir, ta Kevichusa-isa shisem.

Swachhra Hi Seva campaign ya kümshia September ita tom ka nungi tenzükter October 2 Gandhi Jayanti nung tembanger. Iba ya Swachh Bharat Mission nung shilem ka lir aser Urban & Rural (Grameen) shilem ana lemsar agir.

## Oting lendong: SC-i Army anema benokba ken o agien

**New Delhi, September 17, 2024 (Agencies):** 2021 küm Nagaland Mon district nung Army-i civilian 13 khasetba tatalokba bushisüngdanga maotsü atema Supreme Court-i tetuyuba agütsüogo.

SC lemtet ajanga iba ken o atema benoka aliba First Information Reports (FIRs) shibangtsür saka Armed Forces sasep nung disciplinary action agütsü lenmang lapoka yutsüogo.

## CM Rio-i 23 buba Dr. T. Ao Trophy tenzüktsüogo

**Dimapur, September 17, 2024 (TYO):** September 17, 2024 nü Chief Minister Neiphiu Rio-i Tuensang nung 23 buba Dr. T. Ao Inter District Championships Trophy tenzüktsüogo.

Iba sentong nung Loyem Memorial Astro Turf Ground, Tuensang nung agi aser CM Rio-i organizing committee aser Tuensang District Football Federation dang iba akhümket asayamong ayongzükba atema pelaba metetdaksü.

"1948 London Olympics nung Indian Football team captain Dr. T. Ao nem tetushi agüja iba asayamong amonger. European Football Clubs-i Dr. T.

December 4, 2021 nü Mon district kübok Oting yimtsüng nung Army telok kati nakmati aturtem amenba gari ka dak aibelema injang khaloktsüdang civilian 6 khaset.

Iba ajanga tensa mejungi aküm aser yimdaklirtem o sepaitem tsüngda raradang civilian 7 asü aser sepai ka taküm sama.

Supreme Court-i criminal proceedings anendaktsür saka

sanction agütsüra iba ken o maneni bushisüngdang aotsü akok ta ashir.

SC-isa Armed Forces sasep nung disciplinary measures tapet inyaktsü lenmang lapoktsüogo.

"Iba tatalokba atema FIRs nung ajemdaker inyakba mapa anentsür. Ajisüaka, sanction ngura iba ken o tembanga angadangtsü akok. Armed Forces-i disciplinary action atema nungdakba inyaktsü akok" ta SC-i ashi.

saisaponger nem temulung agütsüsü nangzük.

2024 Paralympic nung Hokato Hotozhe Sema-i bronze medal nguogo aser National level nung Naga nunger saisaponger aikati takok ngua arudar, ta pai shisem.

CM Rio-isa Loyem Memorial Ground, Tuensang nung galleries, security wall aser electrification mapa inyaktsü nangzük.

Iba sentong nung MLA & Planning Committee Convener Lima Onen-i tesentepertem pelaa agizük, Nagaland Football Association President K. Neibou Sekhose-i tir o jembi aser Youth Resources and Sports Advisor A. Keoshu Yimkhiong-ia o tatsüka jembia liasü.

# Mkg.nung MCH & Family planning outreach camp ayongzük



**Dimapur, Rongjui/Sept. 17 (TYO):** Indian Red Cross Society aser IMDH Mokochung lungjemer CMO Office ajanga CHC Mangkolemba nung August 31, 2024 nü aser CHC Tuli nung September 14, 2024 nü Maternal and Child Health (MCH) and family planning outreach camp ayongzüküa liasü.

Iba camp nung paediatric,

gynaecology, Family planning methods aser danga tashidak agi shirangba atema temang repranga yaria liasü.

Iba mapang teyari angur nem mozü angati agütsü aser family planning, maternal & child health atema IEC leaflets tem agüja liasü.

Iba camp nung nisung trok nem medical service angati agütsü, ANC check up trok,

tubal ligation 33 aser copper-T insertion pezü liasü.

Medical team nungya Dr. Limanaro DPO (UIP&RCH); Dr. Ademla Tinu, Consultant (OBS & Gynae); Dr. Spongmeren, SMO (OBS & Gynae); Dr. Maongkala, MO Mongsenyimti; Dr. Sentiyenla, SMO; IMDH, CHC Mangkolemba aser CHC Tuli nung staff tem liasü.

# Mangkolemba nung Mobile Skill Morung tembangogo



Department of Employment, Skill Development & Entrepreneurship ajanga Mangkolemba nung amtsük yanglutsü atema "Skill Development for Rural Women through Mobile Skill Morung" training hopta ana agütsüba sentong September 14, 2024 nü tembangdang tangokba noksa ka yangi angur.

**Dimapur, Rongjui/Sept. 17 (TYO):** Department of Employment, Skill Development & Entrepreneurship ajanga Mangkolemba nung amtsük yanglutsü atema "Skill Development for Rural Women through Mobile Skill Morung" training agütsüba sentong September 14, 2024 nü tembanga liasü.

Tetsür 25-i iba training takok ngua agia liasü aser parnok nem kulizüing kaket den osset balala agüja liasü.

Iba training tembangba sentong ya District Employment Exchange/Model Career Centre, Mokochung, Marsenla Longkumer lenisüba kübok agi aser Associate Pastor, Mangkolemba Baptist Church, L. Watinaro-i sarasadema sentong tenzük.

Pinnacle Skills nungi Tiamoa Tzudir-i training agütsüba

indang jembidang, parnoki training agütsüba kisüing masü saka pei sasa pei poksünga alitsü atema shilem agir nem nüngdakba ossettsüet agütsüba indang ashi.

Pai training agirtem dang item sempet amshia külem tenzükür tsüingta telok tenteter brand tasen tenzüktsü atema inyakttsü ayongzüküa liasü.

Training agirtem rongnungi Achetla Longchari-i jembidang Department aser Pinnacle Skills ajanga training aser teyari agütsüba atema pelaba lemsatepa liasü.

Sentong nung Mangkolemba Town Council (MTC) chairman, Spong Longkumer-i training tatem tonga agiteter nem tenüingsang agüja liasü.

Pai parnok dang parnoki yangluba amtsük-amsang tem kinük-kisang ajanga nung angutsüsa inyakttsü aser

business tasen tenzüktsü atema ayongzüküa liasü.

Iba sentong tembanga District Employment Officer (DEO), Mokochung, T. Yimlikhumzuk-i melepzüing o jembidang, amtsük-amsang yangluba ya business tajung ka lir ta ashi.

Iba training takok ngua agitettsü atema meranga inyaktertem dang pai pelaba lemsatep aser ADC Mangkolemba, Moakumzuk NCS-i anir Mangkolemba Administration aser Chairman Spong Longkumer-i anir MTC Counsellors tem dang pelaba lemsatepa liasü.

Iba training ya ajanga Department-i yimdak-yimtsüing nung aliba tetsürtem nem skills tajung angazükdakttsü aser entrepreneurship aser rongsenketzüing tsütsü pei peria alitsü asoshi yariba ajiteter.

# Chief Secretary Dr. J. Alam-i Nagaland müreka ayutsü ayongzük

**Dimapur, Rongjui/Sept. 17 (TYO):** Swachhata Hi Seva Campaign nüngtem nung Nagaland Chief Secretary, Dr. J. Alam, IAS ajanga lenirtem, institution balala, army, police aser ketdangsürtem densema state nung aliba senso ajunga dang jana-reja anema raraba nung shilem agia Nagaland shidakba nung müreka kumdakttsü ayongzük.

Swachh Bharat Mission aser

Swachhata Hi Seva sentong tenzükür state nung temelenshi jenti lir, aser mürekmejuba tsütsü tajungba kumaka Clean Nagaland nükjidong tongtetsü ano lenmang talang lir, ta Dr. J. Alam-i ashi.

Pai nübur ajunga dang lungjemer temulung agüja iba campaign nung shilem agitsü ayongzük aser "Moi Laga Jabrah, Moi Laga Kaam" ta ashi.

# Aadhaar Biometric Update asütsü metetdakttsür

**Dimapur, Rongjui/Sept. 17 (TYO):** Aadhaar yanglutsü atema UIDAI (Unique Identification Authority of India) nung arishi küm telatet agüja mali. Kinü tanur sozüklia tsürabor indang Aadhaar number den tanur indang birth certificate lira Aadhaar yanglutetsü (0-5 years age group).

Tsürabor temi pei District (Enrolment Centre at DC/ADC/SDO (C) Office/EAC, Post Office, Banks, etc. as applicable) nung aliba Aadhaar Enrolment Centre nun goa tanur indang biometric authentication sütetsü, ta sangdong ka ajanga ashi.

Arishi küm 5 tekübok aliba tanur atema enrolment mapang tanur indang noksa dang tangoktsü aser danga biometrics information (finger prints & Iris) kecha magir.

Tanur ya arishi küm pongu ajungba sülen Mandatory Biometric Updates ana (Photograph, Ten fingers & iris) nüngdaker aser ano pa/la indang Aadhaar validity mesamadakttsü asoshi arishi

küm 15 nunga update asütsüla, ta ashi.

Iba mandatory biometric update ya angati (arishi küm 5-7 & 15-17 tsüingta agira) alitsü aser tekalen shia aliba Aadhaar Enrolment Centre kisüing nung inyaktetsü.

Iba age group nung Mandatory Biometric Update atema document kecha menüingdaker.

School azüingba tanur tema pei mobile number ya Aadhaar den sendakteptsü ajungshir, kechiaser service balala (NEET, CUET ama tatidang balala atema online applications/registration) Aadhaar OTP Authentication nung ajemdaker amshitetsü. Mobile number update asütsü atema kaketshir tem anasatiba Aadhaar Enrolment Centre bushia aotsüla aser yangji Aadhaar nung mobile number update asütsü document kecha menüingdaker, ta sangdong ajangasa ashi.

Na anasa Aadhaar Enrolment Centre aliba jangtatsü atema <https://bhuvan-app3.nrsc.gov.in/aadhaar/> nung angutsü.

**NAGALAND POLLUTION CONTROL BOARD**

Signal Point, Dimapur - 797112, Nagaland  
Tel: 03862-245727, TeleFax: 03862-245728  
Website: [www.npcb.nagaland.gov.in](http://www.npcb.nagaland.gov.in) e-mail: [npqb2@yahoo.com](mailto:npqb2@yahoo.com)

**AMBIENT AIR QUALITY FOR KOHIMA AND DIMAPUR CITY**  
**KOHIMA ASER DIMAPUR NUNG MOPUNG MERÜK-MEMERÜKBA JENJANG**

Sl. no	City	Location of air station	Type of area	Monitoring dates		Permissible limit As per the National Ambient Air Quality Standards "Iba tasazük alemabo metudakttsütsüla"
				10.09.2024	12.09.2024	
1	Dimapur	Bank Colony	Residential	59	60	<b>100 µg/m<sup>3</sup></b>
2		Dhobinala	Commercial	92	111	
3		NPCB Office, Signal Colony	Residential	55	39	
4		Tenyiphe, Chumoukedima	Commercial	53	58	
5		Nagarjan	Residential	41	53	
6		Viola colony	Residential	33	40	
7		Burma camp	Commercial	100	115	
8	Kohima	Opposite NST Office	Residential	24	22	
9		PWD Junction	Commercial	35	29	
10		High School Junction	Commercial	57	54	
11		Midland (Upper)	Residential	35	25	
12		Forest Colony	Residential	30	26	

**Iba osang ya nübertem ajangzüktsü atema Nagaland Pollution Control Board-i agütsür.**

**OM Books**

**DIMAPUR**  
*Christian Book Fair*

**9 - 21st SEPTEMBER 2024**  
**9:30 AM - 5:30 PM**  
(Sunday Closed)

O.M Books, A.H Road, opp. Dimapur Sumi Baptist Church, Chakhesang colony, Dimapur.  
☎ 98620 08081

**A collection of 9 Valuable Books**

1. Every day with Jesus - 299
2. Quick Scripture Reference for Counseling - 249
3. How to Read the Bible For all its worth - 249
4. 101 Bible Lessons - 325
5. Fire of Revival - 99
6. Peace with God - 225
7. Heart of Christian Leadership - 199
8. Preparing Expository Sermons - 275
9. New Evidence that Demands A Verdict - 949

**1950 /-**

**2557, offer Price 1950/-**

## Arvind Kejriwal melena Atishi Delhi chief minister akümtsü



Delhi nung Minister ama tenangzüktepba agiba sülen Delhi Lt Governor Vinai Kumar Saxena-i Atishi den salemba mapang Arvind Kejriwal-i repranga ataba noksa nung angur. Atishi Delhi chief minister kümdaktsütsü atema AAP MLA tem ajaki mulunga agizükogo.

**New Delhi, Rongjui/September 17 (Agencies):** Aam Aadmi Party (AAP) tekolakba Arvind Kejriwal-i Mongolbarnü pa melena Delhi chief minister mapa abentsü asoshi Atishi tenüng benoka liasü.

Kasa mapang nung Arvind Kejriwal-i Mongolbarnü Raj Niwas nung lieutenant governor VK Saxena den senden amenba mapang pa mapa nungi anenba shiti agütsüogo.

“Arvind Kejriwal-i Delhi LG nem pa mapa nungi anenba shiti agütsüogo... MLA ajaki CM mapa abentsü atema Atishi shimogo.. Atishi-i sorkar tentettsü atema temeden meshiogo,” ta Aam Aadmi Party lenir Gopal Rai-i osangbenertem dang ashi.

Delhi liquor ochi mashi ken o nung Supreme Court-i Kejriwal nem bail agütsüba sülen ghonda 48 tsüngda pai Delhi chief minister mapa toktsütsü ta Arvind Kejriwal-i sangdonga liasü, aser anogo ana lir tang pai ashiba ama CM melenogo.

Paisa, pa election nung

tokteptsü aser Delhi nung aliba nüburtemi pa ochishir nisung ka ta kuli agütsüba sülenang pa iba menden nung ametsü ta ashi.

Arvind Kejriwal-isa, Election Commission dang Delhi assembly election ya November ita agitsü takhangba ka agütsüogo.

Atishi ya party aser Delhi sorkar nung tongtibang nisung ka lir aser finance, education aser PWD densema lai tongtibang portfolios aika bena lir.

Atishi ya Kejriwal den kanga junga sendaktepa aliba lenir ka aser Kejriwal o Manish Sisodia na tepuokdak yua aliba mapang lai Bharatiya Janata Party anema kanga tasü ita raraogo. Laisa, Delhi nung tzü agi kanga anüngba mapang AAP sorkar tenüng nung ajang ajanga nokdaka liasü.

Saurabh Bhardwaj, Gopal Rai aser Kailash Gehlot nung densema AAP nung tongtibang lenirtem kari Chief minister mapa abentsü akok ta bilema aliba mapang ka nung Atishi shimogo.

Mongolbarnü Bharadwaj-i

ashiba agi, Delhi CM menden nung shiba mendir menaka iba menden ya Arvind Kejriwal meyong lir, kechiyong linük yimtiba nung aliba nüburtemi pa nem vote agütsü.

Delhi excise policy ken o nung Supreme Court-i Arvind Kejriwal nem bail agütsüba sülen anogo ka lir Atishi shimogo. SC-i Kejriwal dang chief minister indang office-i maitsü atema tetuyuba agüja liasü. BJP-i ashiba agi, Supreme Court-i tetuyuba agütsüba ajang Arvind Kejriwal-i CM mapa toktsü.

Arvind Kejriwal ya 2013 küm nungi Delhi indang chief minister liasü.

Atishi ya Delhi Assembly nung Kalkaji constituency nungi lir. La mezüngbo Delhi sorkar indang education department advisor liasü aser iba sülen 2020 küm election nung takok ngua MLA aküm.

Manish Sisodia aser Satyendra Jain na ochi mashi ken o nung aija apuba sülen la 2023 küm March ita Delhi sorkar kübok Cabinet minister ka aküm.

## Doctor tem takhangba atalokja Kolkata Police Commissioner melenogo

**Kolkata, Rongjui/September 17 (Agencies):** Chief Minister Mamata Banerjee den Hombarnü senden amenba mapang longkak aita aliba doctor tem dang nangzükba atalokja West Bengal sorkari Kolkata Police Commissioner Vineet Goyal transfer sütsüogo aser pa melena Manoj Kumar Verma shimogo.

Manoj Kumar Verma ya 1998-batch officer ka lir aser pai Additional Director General of Police (Law and Order) mapa bener liasü. Pai iba mapa ya taküm January ita Jawed Shamim ket nungi melenzüka liasü. Shamim-i tang Verma

melentsü.

Vineet Goyal, shiba 1994-batch officer ka lir aser 2021 küm December ita nungi Kolkata Police Commissioner liasü, pai Additional Director General of Police & Inspector General of Police (Special Task Force) mapa agizüktsü.

Ketdangsurtem mapa tangai yokba aser shibatam indang osang Mongolbarnü metetdakja liasü, kong ano tanga police officers pezü tenüng densema lir. Parnok rongnung Deputy Commissioner, North Division Abhishek Gupta-a densema lir. Pa Dipak Sarkar-i melenogo. August 9 nü tashiyim agi shi

nung medemba sülen tepseta toktsüba doctor laer tsürapurtemi ashiba agi Gupta-i parnok nem sen agüja liasü.

Iba iyakyim temai adokba mapang nungi longkak aita arua aliba doctor temi Hombarnü Chief Minister Banerjee den ajurutepogo. Senden live sayutsü akhangba ajang sensaksemstü asoshi sentong yangluba aiben tamakok anguba sülen Hombarnü ajurutepetogo.

West Bengal sorkari ashiba agi, Hombarnü doctor tem sensaksemstü atema jaokba ya pongubenbuba aser tatembangbuba liasü.



Patna nung tzünglu kanga sashia aruba ajang Ganga ayong moshia ayimba sülen garitem tzü agi metsünger aliba lenmang ka ajang aoba noksa nung angur.

## PM Modi-i Subhadra Yojana, railway project amenoktsü

**New Delhi, Rongjui/September 17 (Agencies):** Ato Kilonser Narendra Modi-i Mongolbarnü Odisha nung Subhadra Yojana amenoktsüogo, koba tetsürtem ajungkettsü atema scheme ka lir.

Modi-isa, sen crore 2,871 alang railway project tem aser sen crore 1,000 alang state national highway project tem virtually amenokja liasü.

Chief minister Mohan Majhi, Governor Raghubar Das, Union education minister Dharmendra Pradhan aser Odisha sorkar kübok tanga minister temi iba sentong nung shilem agia liasü.

Ketdangsurtemi ashiba agi, tetsür lakh 25 dak tema nem Mongolbarnü Subhadra scheme kübok mezüngbuba tranche sen 5000 agütsüogo.

Iba scheme ya arishi küm 21 nungi 60 tsüngda aliba tetsür crore ka nem küm pongu tsüngda senotsü teyari 50,000 agütsütsü nükjidong nung

amenokogo.

Kasa mapang nung PM-isa, Pradhan Mantri Awas Yojana-Gramin (PMAYG) kübok state 14 nung beneficiary lakh 13 shi nem senotsü teyari mezüngbuba instalment agütsüogo.

Modi-i, Bhubaneswar nung Pradhan Mantri Awas Yojana – Urban beneficiary ka den ajurutep, kong lar kinungertemi Modi asoba anogo tenüng nung kheer (chiyongtsü tanang) agüja liasü.

Maneni PM Modi-isa, iba central scheme kübok ki kibur tasentem nem ki sabi agüja liasü.

CM Majhi-i iba scheme tajung benokba atema tenüngsang agütsü aser iba ajanga temelenshi tulu adoktsü ta ashi.

“Subhadra ya kanga scheme tajung ka aser iba ajanga temelenshi bener arutsütsü. Iba scheme yagi tetsürtem parnok nükjidong ataloktsü asoshi teyari agütsütsü,” ta Majhi-i ashi.

## Nia Chief Minister kümner: Ajit Pawar



**Pune, Rongjui/September 17 (Agencies):** Maharashtra Assembly election magi tsüngda NCP national tir aser Deputy Chief Minister Ajit Pawar-i tang mezüngbuba pa tebilemba lemsatepa pa state Chief Minister kümner ta ashi.

“Nisung ajaki parnok indang lenir Chief Minister kümdaktsüner. Iba nungya nia densema lir. Ajisüaka Chief Minister akümtsü atema nütsünyongtsük agi peria alitsüla. Nisung ajaka tejangrababo mataloker,” ta Pune nung nungtugu Dagdusheth Haldwai Ganapati temple nung puja ka nung shilem agiba sülen Pawar-i ashi.

“Nisung ajak tebilemba aser tejangraba lir, saka nisung ajakibo pei taginüba monguteter. Ajisüaka iba atema vote agütsütsü asoshi temeden Dr Babasaheb Ambedkar-i agüja lir aser voter tem kabuma nung lir. State Assembly nung menden 288 aliba nungi 145 bo angutsü nüngdaker,” ta Pawar-i ashi.

Ajisüaka paisa, BJP, Shiv Sena aser NCP ta MahaYuti (grand coalition) pur taruba election nung Chief Minister Eknath Shinde lenisüba nung tokteptsü ta ken o jangjashitsüogo.

“Onok ajaki grand coalition kümtettsü atema meranga

inyakdar. Grand coalition sorkar kümtetba sülen onok ajak senden ka mena Chief Minister dak sendakba nung telemtetba agitsü. MahaYuti pur taruba election Chief Minister Eknath Shinde lenisüba nung tokteptsü,” ta pai ashi.

Eknath Shinde Chief Minister kümdaktsütsü atema Shiv Sena nungi lenirtem inyaktepa aliba mapang ka nung tang Pawar-i iba olen ya lemsatepogo.

Kasa mapang nung BJP lenirtema Devendra Fadnavis tanaben Chief Minister kümdaktsütsü atema inyakdar. Maneni NCP lenirtemia Maharashtra kübok tesem kar nungbo Ajit Pawar ya taruba Chief Minister ama sayua poster tem sayadar.

Deputy Chief Minister Devendra Fadnavis-i tawa ashiba agi, “BJP indang Parliamentary Board-i Assembly election tembangba sülen Chief Minister mapa dak sendakba nung telemtetba ka agitsü. National Democratic Alliance lenirtemi telemtetba agibaji onok ajaki agizüktsü. Eknath Shinde ya state tekolakba lir anungji pa lenisüba nung onok nüburtem dangi aotsü.”

Paisa, iba ken o dak sendakba nung MahaYuti partner tem yongtsü nung kecha mangatettep mali, ta shisem.



## TIR YIMYIM YIMOBILEM (EDITORIAL)

DIMAPUR RASEMNÜ, SEPTEMBER (RONGJUI) 18, 2024

### Election ajak külemi agitsü !

**L**inük nung BJP teloki jangraba mapa kaji, tang amai Parliamentary (Lok sabha) election khen aser state shia assembly election khen ta masü saka election anaprongla ya külemi dang aginer aser iba taginübaji tang parnok i anir yimsüsüba mapang nung yasa mapa küma inyaksü ta ato kilonser Narendra Modi-ibo metetdaksüogo. Atangji, ibaji tamakoktsü ta masü saka melamelaa jembiba amaji masü saka mapa küma inyaksü kanga tasak asütsü. Ibaji jangraba kisüng agi meinyaktetsü mesüra yimjak nung yimyim ka agütsüba agi mapa küma moutettsü, saka tamasa linük temzüngi iba yimten inyakyim tasenji, inyaka aodang metsükdaksü atema, temzüngi aidaktsütsüsa akümtsü. Nübertemi mulungba inyakba democratic yimten nung tajung kaji ibaji lir. Tetezü, nisung kati mesüra telok kati junger ta bilemba kija agi masü saka ajaki ta masüyonga teimbai mulungba nung telemtetba agia aoe. Atangji, tang amai linük nung election agi manenba ya majung, kechiyong election agiba nung rongsen aser mapang endoker aser nisungtem rongnung takok toktepa tamajung agiteper asünungji, linük nung sensosangertem longjemshitsü melen meputepba-meputepba akümer. Talisa, khen parliamentary election, ano aji temli state assembly election ta election agi manenba agi government nung alirtema tipdema linük aser nübertem asoshi terenlok mapatem indang bilemdanga inyaksütsü mapang peria mangur. Iba ama tipmadem tebilemtsü ajuruba agi BJP teloki iba inyakyim nung temelenshi tajung ka bener aruner. Aji shitak, kechiyong koba sentong aser koba mapa agi nübertem akoksadaksür aser linük rajang kümdaksür, itemji reprangteta temelenshi tajung bener arutsübaji yimten yimsüsürtem mapa lir. Ajisüaka, India yimten nüchiso ngur, joko, küm 70 dak tali parliamentary election khen aser state assembly election khen ta, kümsük metongjungi government raksa ka mesüra, küm pungo shia election agia arur. Ashiko, election agipet agiba ajanga timtem aser takoksa ajuruba ya BJP teloki dang masü saka tamalen government nung aliba yimten teloktemia meteta jembir alitsü, ajisüaka odang memelenshi election sülen election agiyonga arubaji tapi agi masü saka tebilemdangtsü aser tetsükdaksü kar alitsüa akok. Aji oda, linük temzüng ozüng yanglurtemia ibaji merajem masü rajemer alitsüa akok saka kasa rongnungbo tang agiba inyakyim ya-ang tajungba asütsü asüba agi government kümer küm pungo ajung shia parliamentary election süli, assembly election süli balala agia aotsü latet südi. Atangji, tang amai masü saka linük nung election tapu anaprongla ya khen nung dang külemi agitsübaji tarendaktsüka lir, kechiyong Lok sabha election ajanga akümba center nung yimsüsürtemi state-tem nung parnok maginüba teloki akümba state government-tem anentsür President Rule agütsüra, Lok sabha election matong tashi mid-term election magii atatsü asü (?) ta asüba tasüngdangba langzümatsübaji tongtibang akümer. Aji oda, center aser state government nung alir tatar yimsüsürtem rongnung kar kümsük küm metongjungi menden azüngtettetsüsa kümra, iba menden asoshijia by-election magii general election den külemi agitsüsa atatsü asü mesüra tang amai by-election agitsü ta asüba onüktem aika tamasa bentettsü nungdaker. Kasaji, center government nunga yimten teloktem rongnung timtem adoker telok kati government bener moutettsüsa kümer anentsüsa kümra, state-tem assembly election agitsüba mapang atatsü asü mesüra state-tem nung government-temji mapang metongjungi anentsür mid-term parliamentary election den külemi mid-term assembly election agitsü ? Item ama tasüngdangba aika jangjashia langzüsü atema tamasa temzüng reprangshitsüsa akümtsü. Aji oda, tang BJP teloki bilemba ama linük nung election tapu anaprongla mapang ka nung dang agitsü aser mid-term election malitsü ta lemtetra, ashiko, iba kümjisa center government nung yimsüsüba teloki state-tem nung par den madenba teloki yimsüsüba state government-bo ajak anentsüyonga aotsü. Iba amaji atalokra, ano linük asoshi ibajang tamajungba asütsü. Item ajakji kasa mapa atema shimba High Level Committee-i tajungba rajema reprangshir alitsü imlar.

## OLEMSABANG

### KECHIBA ILP & RIIN INYAKYIM YA TAKOK NGUA MEINYAKTETER ???

~ L. Kika Pongener.

*(Yashi adok nungi...)*

Anungji iba ILP inyakyim ya shitakba (Reality) nung takok ngua inyakdi ta bilemra, tamasa takar/tulurtemi pei ajangzüktsü bilemba/pei ajang asaba shisatsü ya endoktsüla. Takar/tulurtemi tamasa pei kimong-lumong anuktsüba mapa nung yua aliba ozüngi memelaba nisungtemji agientsüla. Ajiser, Naga nung kin shia nung Hoho-temi pei pei kin senso rongnungi shirnoksa item ozüngi memelaba kintem den kibalembua ali parnok dakji action agitsüla...ta-ka temzüng-ozüng takang kar yanglur meinyakra, iba ILP inyakyim ya takok mangutsü. Asen Ao kin yimden bangdak tematiba sabang Ao sendeni iba dak sendakba nung temzüng-ozüng takhang ka yangluba ama-to....Naga nung tangar kintemia yanglua benshira takok angutsü sudi ta bilemer. Ajak dak alaka, sorkari zübazübaa toktsüba agi iba ILP & RIIN inyakyim ya tanü tashi tamakok jenjang nung lir, talisa Dimapur jila nung kangasa tamakok jenjang nung lir.

Ajak dang alia, Register of Indigeneous Inhabitants of Nagaland (RIIN) inyakyim ya mapa küma inyaksüba atemzükter sernung, tanü tashi mapa küma meinyakteti tamakok nung lir. Iba inyakyim yagi 1963 küm Nagaland State manguba mapang tashi nung arua alir tsüma-longmar/tangar kin ajak nem lisopur temeden agutsütsü, saka iba sülen arurtem nembo lisopur temeden (Permanent residents) magutsütsü ta asüba inyakyim asütsü sudi. Aji oda, iba RIIN inyakyim ya mapa küma meinyakteti züba-zübaa toktsüra, küm ishika tsüngda nung tsüma-longmar ozüngi memelaba kintem nem asen Naga nung lisopurtem moksepdaktsütsü. Item ozüngi memelaba kintemi asenok chichiba Naga nung lisopurtem madak tashi amshitsü aser oda oda lia lia-bo parnok dang masüngdangi mapa kecha meinyaktetsüsa tensa kati meneptsü. Aji oda, tanga sunga joko mapatong aika nung parnok asenok lisopur madak tashi amshidagi. Asenoki jungjunga mebilemdanger tang ashi, Naga lima nung Jila tulu ajak nung tongtipang shishilempaba (Business establishment) mapa ajunga tsüma-longmartemi ajepbanger jenjanga parnok tunutsü atur, kechisarena ajak nung parnok sunutsü asür. Ajisuaka, asenok lisopurtemi parnok dang kecha meshitetsüsa tensa mapang ka küma-dokogo.

Tanü asen lima nung item nisungtem karibo linük tenzükter tenung ammer saru-saji sarua asenok lisopur dena amokmerenba-a tesem kar nungpo atalokbaa angazükter. Joko Dimapur Jila nung balaka item nisungtemi kimong-lumong tulu alizüka yur, ki-o-jen tajung yanglur, asenok lisopur dang nungi rongsen nunga takaba, shisatsü temetetba nunga temetetba, tekoloka parnok techiraba. Ajioda, parnok nem kechisarena ajak nung asenok lisopur amokbangdaksüogo. Surabang, tang RIIN inyakyim mapa küma meinyaktet tsükdaker aliba ya kechi küli ajanga meinyaktetsüsa aküm (?)...ta jungjunga bushidangtsüla. Ashiko, item tsüma-longmartem yagi, RIIN inyakyim ya mapa küma inyakra, parnok libalirotsü mesademtsü asüba agi, aji nokdangtsü atema asen Naga nung pei sasa tongtipang nisung ama bilemba (Self Style VIPs) kar sen agi alizükter, parnok tashi nungji mapa küma meinyakdaksür asü...??? Mesura Politicians, Bureaucrats, Law makers, NGOs, Leader kar süpokrem agi tebang nembangtsür, tetsükdaksü küli aika sayua meinyakdaksüi soita ayur asü...???...ta nubur aika mulungjang nung asüngdang...!!!??? Asen Naga nung lisopurtemi metettsüba kanga tongtipang kaji, Dimapur temeküt nung aliba yimsüngtem ajak nung, tsüma-longmar, Naga nung masüba tangar kin, mesura Naga nung-sa suaka tanga state nung alirtem nem lisopur temeden magutsütsüla. Aji oda, asenok sen teraka ajangzüktsü mechi, tarutsü nung Naga nung ajak khuret asütsüsa yimsusur shinga-ia meinyaktsüla. Asen Naga nung ya jungjunga bilemdangra 'An molokbang nung atem' amai asen sasa asen apotsü sang asortem lir. Anungji ILP & RIIN anaprongla takok angutsü atema sorkar-ia o agi masü mapa agi inyaksüla.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

## Sudan nung Anglican cathedral ka leper ama kumogo

**Khartoum, Rongjui/Sept. 17 (Agencies):** Sudan nung civil war ajanga region nung teraksa balala bener arujaka Khartoum nung aliba All Saints Anglican Cathedral ya tanü tashi nokdaka lir. Saka iba compound ya tangbo leper ka kumogo, koba temeshi sapang raksar aser mi apotsü atema sepaitemi menden süksa tsükogo, ta Archbishop Ezekiel Kondo-i ashir.

2023 kum April ita rara tenzük dang iba tekülem ki ya arishi kum 67 tain primate of the Episcopal (Anglican) Church of Sudan, Kondo indang menden liasü. April 15, 2023 nü paramilitary Rapid Support Forces züngsem temi iba tesem ya atsüngdoka yangji amendaker parnok operation agi aser Kondo aser par kibonga yangji dang ali.

“Ibai kanga kera atalok. Shingaia imla meliasü. Ibai Honibarnü liasü aser onoka Deobarnü sentong asoshi renemtsü atema office nung liasü, koba Easter Sunday sülen mezüng hopta sülen. Onoki prangbong ola kanga tesashi angashi aser kimai aludang anas mokozü agi sünger liasü,” ta Kondo-i Port Sudan nungi RNS dang ashir. Kondo ya Temerem Tzüyim nung aliba Port Sudan yimti nung taoba kum June ita nungi jenoka alir.

Iba northeast Africa linük amokbangtsü asoshi rara ya Sudan nung military sorkar indang telok ana tsüngta liasü. Telok ka Abdel Fattah al-Burhan-i aniba Sudanese Armed Forces aser ka Janjaweed lenir Hemedti-i aniba paramilitary

Rapid Support Forces liasü. Parnoki civilian sorkar azüoktsü meranga atsütepba sülen kati ka anema nokdak.

Media aser teyari maparen nokdangba ajanga iba mapang teraksa ajuruba asadangtsü tasak akum. Iba mapang United Nations-i nisung 750,000 aya wara ajurutsü tia nung lir ta ashi, aser U.S. envoy Tom Perriello-i iba rara nung nisung 150,000 tepsetogo ta ashi.

Dangar temi nisung 15,000 asüba jangjaogo ta ashir. Iba rara yagi nisung million 10 dak tema pei ki yutsür tesem balalai jena ao aser ano nisung million 25 shi humanitarian aid nüngdaka akum.

Nisung kar atema ibai civil war tanabuba nungi jena aoba lir. South Sudan nung 2013 nungi 2018 tsüngta rara nung nisung 400,000 jungnüa tepset.

Iba cathedral ya army headquarters aser airport anasa lir, kong taoba kum Ramadan mapang rara tenzük. Nok-nü amer raraba tali akumdang Rapid Support Forces-i tekülem agiba tesemtem nung bomb mepokloktsütsü teimla nung par sepaitem ya iba tekülem ki compound bushia anir aru.

“Parnok gate nung liasü aser onoki kecha meinyaktet. Onok gate alema motet. Yangji aliba kibong ajunga tekülem kidang adenshi. Aser dangara aika onok alidaki aru. Yangji onok aonung asem ali,” ta Kondo-i ashir.

Iba cathedral telung nung tzü mesüra chiyongtsü maka asemnü aliba sülen Kondo aser danga lenirtemi iba tesem yutsür aotsü telemtetba agi. Prangbong

agi tuitter asüngdangyaba sülen sepaitemi parnok yok. Arogo tenzük tem ghonda ka ser tesadang tetsüng agi jajar parnok Khartoum south leni aotsü gari angu, kong azüdokshi ajema liasü. Kondo'er kibong yangji ita ana ali aser bomb pokloktsüba tali tesashiba akumba sülen ano ainshitsüsa akum.

Onok anasa bomb ka tsükba sülen Port Sudan leni ozü kibong aotsü telemtetba agi. Tensa kanga majung liasü saka Tsüngrem dang pelar. Pai onok kumzük, ta Kondo-i ashir.

Port Sudan nung lia Kondo-i yimjung asoshi jemi aser yangji tekülem sentep agi aser Khartoum nung aliba Anglicans tem den teti osang agitepa liasü.

“Yangji nüburttem den pastor tem lir aser ni parnok dang tsüboa malitsü ashir.”

Greater Khartoum area nung Anglican tenlaki 33 aliba nungi pongu nung dang tekülem magiteter.

“Arogo balala agi tentetba lokti tulu dang Sudan nüburt ten teyari agütsüdaktsüner. Chiyongtsü magütsüra nisung aika asütsü,” ta Kondo-i ashir.

Sudan nütsüng yongsük shilem asem dang tajemba Khristanpur aser shilem 91 Muslim nung lir, ta 2020 Pew Research Center data ajanga ashir. Tang tashinung army tem tsüngta raraba mapang tekülem ki 165 makogo mesüra raksatsüogo, ta Open Doors ajanga ashir.

Iba rara ajanga arogo lenir aser missionary organizations timba Khartoum nungi ainshiogo aser tang tashi rara manener.

## ANOGO ABEN TSÜNGREM DEN

### Tsüngrem Ne Den Lir

Yamai temeranger Kibubai ashir: “Item anogo nung ya oda ataloktsü, kintem oshi ajak nungi nisung teri Yihuda nung ka dak sü nung sotter ashitsü, onok nenok den aotsü, kechiyong Tsüngrem nenok den lir ta onoki angashiogo. Zak. 8:23.

Tsüngremi Pa nüburttem Tanela Temeshi agi sünga lidaktsüner idangji tangari Pa ain parnok dak aliba metettsü.

Ainkar Zakaria ajanga, Tsüngremi Pa nüburttem dang parnok pa atenba balaka sayutsüla ta ashi. Tsüngremi nüburi Pa anasa jajara, alima ajungai parnoki Tsüngrem metetta lir ta metettsü. Nüburi Tsüngrem chir ka ngura, parnoki pa/la den alitsü yongyatsü kechiaser yamaji aliba ajanga parnoka Tsüngrem anasa alitsü ta parnoki bilemstü. Tekong 20 nungi 22 tashi nung kintem teyongya alidang ainkari ashir.

Tangar ne tsütsüi anir arutsüsa Khrista akaba kuli ne taküm nung alitsüla. Parnoki parnok chirtem ne chirtem den lidaktsünütsü kechiaser ner chirtem Tsüngrem metetba nung indaktsü. Mapa agütsürtemi na parnok mapa nung anioktsütsü, aser tanishir südaktsünütsü kechiaser parnoki na Tsüngrem den tsüngchir süa aliba metet. Ne taküm aser kibong tangar atsüa aruba tashi (magnetic) ka ama alitsüla. Parnoki ne den aser ner kibong nung Tsüngrem dena lir ta bilemba ama ne taküm aser kibong alitsüla. Nai Khrista ne den aliba kuli tali sayuli, nüburttem tali Pa dangi atsür aruli ta asütsü.

## Pastor David Lin kum 17 sülen tepuokdak nungi chiokogo

**Washington, Rongjui/Sept. 17 (Agencies):** California Pastor David Lin kum 17 tashi China nung tepuokdak lir United States-i meyipa aruogo, ta State Department-i Deobarnü shiogo, anungji free speech advocates temi ola adokba aser pa tai nung apu ta US ketdangtsür temi jembiba ken o tatem kati aruogo.

“People’s Republic of China nung tepuokdak nungi David Lin chiokba pelashishia agizük,” ta State Department ajanga ashir aser arishi kum 68 tain pastor-i kum 20 jungnüa nung par kinungertem ajuruteter ta ashi.

China ketdangtsür temi pa tepuokdak nungi chiokogo aser pa Deobarnü San Antonio, Texas-i arutsü ta State Department-i Honibarnü osang agütsü, ta Lin'er jala Alice Lin-i ashir.

“Tepang agi iba tepela rasaa meshiteter,” ta lai ashir.

Lin ya US senso ka lir aser pa 2006 kum Beijing nung Christian training center ka amenoktsü asoshi inyakba mapang China ketdangtsür temi mezüng asüngdangya asü aser linük yutsür maotsü tenokdangba agütsü. Pa mapang tatsüka lir apu aser tensa mejangjai ashikülak mapa

inyakba tai tongloktsü. December 2009 kum Lin ya takum tepiyong tepuokdak ayutsü obendang agüja liasü. Pai item taittsüba kata magizük. Tepuokdak ayutsüba kum aiben ajemtsür pa 2029 nung chioktsü liasü.

Lin ya China indang underground house church movement nung tongti shilem agia liasü, kong miimshia tekülem sentong agitsü atema nija kidang sa adenshir aser state-i sponsor asüba tamangba yimsü tentet nung sendaktepa mali.

Mapang talangka nungi China ketdangtsür temi iba movement anema inyak aser shilem agirtem merenshi, apu aser temerenshi tesashi agütsür, ta U.S. Commission on International Religious Freedom ajanga shia liasü.

Lin-i pai tai mali ta akang-akanga nokdakaka pa tepuokdak ayuba atema temulung magütsü, kechiaser pa tepuokdak ayuba ya Tsüngrem-i shimba wadang ka liasü ta bilema liasü, ta par jala-i 2019 kum Washington Watch radio program ka nung ashir.

La tebui kinungertem dang ketdangtsür temi documents melenshitsü aser nangzükba ka

nung meyongnem agütsüdaktsütsü merang, saka pai aibelen mapa meinyak nungji meyongnem magütsü ta ashi, ta lai shia liasü.

“Onoki metetbabo China nung arogotem asoshi khuret abenba mechi pa China nung liasü. Arogo ka aser Christian training center ka yangertsü pa mangdang liasü. Pa tamangba yimsü mechi tepuokdak ayu,” ta Alice Lin-i ashir.

Pai tesüsa onok dang, ‘Shisa tebolu, ni kechi inyaker Tsüngremi meteta lir. Ni yangi alitsü ya Tsüngremi mulungba. Tsüngrem o angashitsü nüngdaker nisung aika tepuokdak lir. Imlibilema shisa tebolu, saka ni atema sarasadem dang süjang. Ni yakta US-i arutsü,’ ta shia liasü. Aji kum ter jakdang lir.

Deobarnü US yimten yimsüsür aikati Lin bhukuma jemi aser ano bendang lima nung America nung pua alitsü chioktsü takhangba agüja liasü.

Item rongnung Rep. Michael McCaul, R-Texas ajanga Deobarnü social media X nung sangdong ka ajanga, “David Lin chiokba osang angashia ni kanga pelar. Dangar aika ama pa apuba ya alima tesem balala nung authoritarians temi

hostage diplomacy tenzükba temaitsü ka liasü,” ta ashi.

China nung pua alir asoshi ola adokba telok, Dui Hua Foundation, California ajanga Lin chiokba pela agizük saka linük yutsür maotsü tenokdangba agütsür aliba nisung 30 densema China nung America nung nisung 200 dak tema temerenshi balala ajurua lir ta ashir.

Open Doors USA ajanga alima nung Khristanpur alitsü asoshi linük tamajungtiba 50 asadangba 2024 World Watch List nung China ya tematiba jenjang nung lir.

China-i tesüba mapang nongovernment-sanctioned house churches anema nokdakba ajanga tamanger zünger mezüngmai apu aser tekülem ki aika raksatsüba den house churches amala nung tenük yoker ozüng tesashi yanglua digital surveillance tashi itshia liasü.

Khristan yimsü kanga kera ainba aser yimjak nung parnok aliba aser lokti anishiba atema lenirtem tali shisabolur, ta ChinaAid tir Bob Fu-i taoba mapanga shia liasü.

Ibai Communist Party atema yimtenren tsütsü tetsübo lir, kechiaser linük nung party

züngsem dang nungi Khristanpur kanga agi timba kumogo.

China sorkari tamangba yimsü ya “Sinicize” südaktsüner, tetetzü parnoki China taginüba nung tamangba yimsü ajungketa lenmang sayuner, ta pai ashir.

March ita Beijing-i Pastor John Cao chiok, shibai ‘illegal border crossing’ ayongzük tai tonglokja kum tenet tepuokdak yua liasü. Ketdangtsür temi Cao aser pa den külem tenzükter Jing Ruxia na March 2017 nung apu aser temelaba makai Myanmar aser China arütsü alema senzü ta tai tongloktsü.

North Carolina nungi Cao ya arütsü alema maodang Myanmar north tsütsü Wa state nung school 16 yanglua yangji tepetzük jenjang nung aliba tanur 2,000 yaria liasü.

August ita China nung Guizhou Province indang yimtiba Guiyang nung house church ka nungi Elder Zhang Chunlei ya kum pongu tepuokdak ayutsü obendang agütsü, shibai sorkar tashi raksatsütsü merang aser ashikülak mapa inyak ta aitsü. Iba ken o ta nüburttem nem memetdaktüsü jembia liasü ta ashir.

**AO OSHI ANGAZÜKDAK:  
TANÜ ANGAZÜKTSÜBA OJANG**



**Tanep**

(v) anükanüker (soft)

\* Tanepbo mopong tanep aon.

**Tanet**

(adv) tetaok, lisa memedem (hollow, uneven place)

\* Tesem tanet nung talitsü ki masütsüla.

**OLONG PAITEP # 6927**

1		2				3		4		5
				6						
	7		8							
9						10			11	12
			13			14	15			
16						17			18	
			19			20				
21		22								23
24										

**TIPLÉN**

- 1. Saku - (4)
- 6. Songjen - (7)
- 7. Mali/Tazüing - (4)
- 9. Tasen apok - (6)
- 11. Songtem - (3)
- 13. Ata liasü - (5)
- 16. Tzüngluden külemi tsüker - (3)
- 17. Aso tila - (6)
- 20. Tashi maküm - (4)
- 24. Tenüing kasa jatepba - (7)
- 25. Ki yangluba oset - (4)

**LANGTSÜNGLEN**

- 1. Taksep - (3)
- 2. Langtem - (5)
- 3. O tamendaktak - (4)
- 4. Nütsü tebuba - (3)
- 5. Anüingdang tesangwa - (3)
- 6. Apitet - (5)
- 7. Yagi jungdaksür - (4)
- 8. Anogo semer ka - (3)
- 10. \_\_\_ tatsü - (3)
- 12. Tebur kidong aser zünga kasatsüingdajatepba - (4)
- 14. Pela agizükba tapu ka - (5)
- 15. Tenüing atet - (3)
- 18. Mejanga onü - (5)
- 19. Talak techira - (4)
- 21. Maneni - (3)
- 22. Nübo teyi - (3)
- 23. Meshi - (3)

**OLONG PAITEP # 6926 TELANGZÜBA**

**TIPLÉN :**

- 2. Pongsen, 5. Lepko,
- 7. Omen, 8. Maongka,
- 10. Yangkhu, 12. Senpong,
- 14. Angu, 15. Raksa,
- 16. Arameso,

**LANGTSÜNGLEN :**

- 1. Alimang, 2. Pongen,
- 3. Samaru, 4. Nün, 6. Pio,
- 9. Nüingdak, 10. Yongya,
- 11. Kongro, 13. Ora, 14. Ata.

**NAI-A YA METETTER MA**



September 4, 2024 nü arishi küm 16 tain Prisha Tapre-i English Channel watangogo. Prisha-i ghonda 11 ser minute 48 nung iba ya inyaktet aser charity atema sen bendentsü nükjiding nung lai English Channel watangtsü mulungtet.

Central London kübok Watford nung alir Prisha-i Dover nungi Cap Gris Nez tashi tzü awa aser iba ajanga lai 3700 GBP (4,07,971 INR) ajangteta liasü. Iba sen ya UK nung amenoka aliba charity Akshaya Patra nem agütsü aser iba telok yagi India aser UK nung tanurtem nem achijemtsü agütsür.

**Manipur nung anogo 11 lir shisaliok rejutem ajak lapoker**

Guwahati, September 17, 2024 (Agencies): Manipur nung anogo 11 tashi shisaliok rejutem shibanga aruba sülen Mongulbar nungi lapokogo.



Külen, security forces-i maneni combing aser search operations inyakdar.

Tanü shisaliok reju kar nung kaketshir aika maru saka teimba ka nungbo attendance tajung liasü.

Bodbar nungi kaketshirtem telongsoba arutsü imlar ta school aser college kaketshirtemi ashi.

Hombarnü Manipur education department-i Mongulbar nungi shisaliok reju ajak lapoktsü tetuyuba agüja liasü.

September 1, 2024 nungi tensa mejungi akümba nung ajemdaker Manipur sorkari September 6 nungi shisaliok reju ajak shibangtsü tetuyuba agüja liasü.

Telungpurtemi amakba sülen kaketshir meyirjang aikati Imphal yimdong nung aser tanga tesemtem nung lungkak aittsü tenzüik.

Kaketshirtemi Manipur Director General of Police, state security advisor mapa nungi anentsütsü aser Central security forces agientsü takhangba agütsü.

Kaketshirtemi Raj Bhavan-i aotsü merangdang sepaitem den

mangatetep adoka raratep.

Iba sülen kaketshir lennirtemi Governor Lakshman Prasad Acharya aser Chief Minister N Biren Singh na den ajurutepa parnoki akhangba onüktem metetdakja liasü.

Hombarnü Manipur sorkari Imphal West, Imphal East, Thoubal, Bishnupur aser Kakching district tem nung internet & mobile data services shibanga aliba lapoktsüogo.

**NSCN-K telungpur ka Assam Rifles tsüingdang temai adok**

Itanagar, September 17, 2024 (Agencies): Arunachal Pradesh nung National Socialist Council of Nagalim (NSCN-K) Khaplang züingsem ka Assam Rifles tsüingdang temai adokogo.

Mongulbarnü Tirap district nung arishi küm 49 tain Azen Wangsu-i Khonsa battalion

tsüingdang temai adok. Pa ya NSCN-K Khaplang telok nung major liasü.

Wangsu ya Longding district kübok Niauxa nung aser pai tesüiba küm 12 tashi NSCN-K Khaplang züingsem ka am alia aruogo.

Wangsu ya Myanmar nung lir ta osang angazükba sülen Assam

Rifles-i par kibong ajanga pa den tongteptsü merang aser pa dang temai adoktsü ajungmeso ta AR ketdangtsür kati ashi.

Mongulbarnep Wangsu-i .32 pistol aser magazine ka bener Assam Rifles tsüingdang temai adok. Pa Khonsa Police ket nung agütsüogo ta AR ketdangtsürisa ashi.

**GOVERNMENT OF NAGALAND**  
**DIRECTORATE OF INDUSTRIES & COMMERCE**  
email : [industry.naga@gmail.com](mailto:industry.naga@gmail.com) e-fax: 08468825666  
[www.industry.nagaland.gov.in](http://www.industry.nagaland.gov.in)

**NO.IND/DEV/SA/78/95 (Vol-II) Dated, Kohima, the th Sept. 2024**

**ADVERTISEMENT**

Interested Indigenous artisans of Nagaland are hereby invited for State Level Award in the field of Handicraft. Only genuine artisans above 18 years of age engaged in the field of Handicraft for the last 5(five) years & above may apply, the application forms will be available from 23th Sept 2024 from the Directorate of Industries & Commerce, Textile Branch, Room No- 62 (top floor), Kohima Nagaland on any working days.

The last date for submission of form is 15/10/2024 after which no application will be entertained.

(P. Tokugha Sema)  
Director of Industries & Commerce

**GOVERNMENT OF NAGALAND**  
**DIRECTORATE OF INDUSTRIES & COMMERCE**  
e.mail: [industry.naga@gmail.com](mailto:industry.naga@gmail.com), e-fax: 08468825666  
[www.industry.nagaland.gov.in](http://www.industry.nagaland.gov.in)

**ADVERTISEMENT**

Dated Kohima, the September.2024

NO.IND/DEV/HORNBILL/314/03 (Vol-III): Interested Entrepreneurs/Societies/Awardees those who are expert on Indigenous Local Produce of Handloom & Handicraft are hereby invited for allotment of stall during the Exhibition cum Sale of Handloom & Handicraft Products as mentioned below.

- Bamboo Pavilion, Naga Heritage Village at Kisama during the Hornbill Festival from 1st to 10th December 2024. The Theme for 2024 Exhibition at Bamboo Pavilion is "Preserving Heritage and Empowering Communities".
- India International Trade Fair (IITF) at Bharat Mandapam, New Delhi from 14th to 27th November 2024. The Theme for the IITF 2024 is "Viksit Bharat @ 2047"
- Udyam registration is mandatory for participating in both the above Exhibition

Stall will be allotted to the selected entrepreneurs by the Selection Committee of the Department.

Application in plain paper alongwith sample with detailed items to be displayed/exhibited/proper authentic address and contact number to be submitted to the Directorate of Industries & Commerce (Room No-34, First-Floor, Development Branch), Kohima on or before 18th October 2024. All the sample items will be screened by the Committee for all the participants and the selected participants should strictly adhere to display the items produce by them. Selected participants will not be allowed to display non-local readymade items/products in the Exhibition. No applications will be entertained after the last date of submission.

(P.Tokugha Sema)  
Director of Industries & Commerce

**GOVERNOR'S SECRETARIAT**  
**NAGALAND :: KOHIMA**  
\*\*\*\*\*

No.G-06/4/A-III/19:: Dated Kohima 17th Sept 2024.

**CORRIGENDUM**

With reference to this Secretariat's Advertisement of even number dated 12.09.2024, the total number of posts in Item No. 2 should be read as 4 (four) and not as rendered.

All other terms and conditions remain the same.

Sd/-  
(Rajesh Soundararajan) IAS  
Commissioner & Secretary to Governor.

# Netanyahu-i rara nukjidong ulushiba sangdong



**Tel Aviv, Rongjui/Sept. 17 (Agencies):** Israel Ato Kilonser Benjamin Netanyahu-i Israel nunger Lebanon arütsüleni jena oa alirtem pei kidangi meyipa shilangtetsü asoshi Gaza nung raraba nukjidong ulushio, ta ashi.

Küm ka shi jaddang Israel-i Gaza amak tenzükba sülen Israel sepai aser Iran-i yariba Lebanese armed group Hezbollah tsungta arütsülen anogoshi amai khatepa arur.

Iba yongji anatsülen alir nisung meyirijang aika pei ki yutsür jena aotsüsa akum aser region nung rara tuluba tenzüksü tensa ka nung lir.

North nung alirtem kumzuka pei kidangi meyipa shilangdaksütsü telemtegba ya yasung Netanyahu indang security cabinet senden amendang agi, ta pa office ajanga Mongulbarnü sangdong ka nung ashi.

Israel north tsütsü alirtem

meyipa shilangtsü atema lenmang ajak agi "military action" dang lir ta Israel indang Minister of Defense Yoav Gallant-i United States envoy dang shir anogo ka lir iba telemtetba ya agi.

Gaza nung ceasefire ka benokra onoki aremzüksü ta Hezbollah ketdangsür temi shia lir, saka Gallant-i mapang tatemter ta tekum dangtsü shia liasü.

Ita aika yimjung ken o atsütepa jembia aruaka Hamas teloki ajungbena October 7 nü Israel maka nisung 1,139 tepseter ano nisung 200 dak tema pua bener aoba nungi tenzükba rara tembangtsü asoshi lenmang monguteti arur. Israel-i Gaza amakba mapang Palestine nunger 41,000 dak tema tepsetogo aser 95,000 dak tema yiruja lir.

US Secretary of State Antony Blinken Mongulbarnü menur Egypt tonga aruba sülen

ceasefire atema tali temulung agüja jembitsü.

Pua alir ajunga kumzüksü, Palestine nungi timtemba yaritsü aser regional security tashi tuluba akumba nung yaritsü atema US-i proposal tasen ka atema meranga inyaker, ta State Department odongtar Matthew Miller-i shia liasü.

Tezüngzüktep ka terenemleni arur ta US-i asadangba Netanyahu-i yimjak nung magizük aser Egypt-Gaza arütsü nung Israel mitkar alitsüla ta shijen ashir.

Linük telungzük nungi mesüra bendang lima nungi ajungshiaka pua alir chioktsü atema tezüngzüktep agitsü asoshi pa memesüzüktep.

Israel north tsütsü Lebanon den arütsülen Hombarnü Israel nunger position aika makogo ta Hezbollah-i ashir aser Israel mitkaria Lebanon nung "terrorist" targets amak ta ashir.

"Tezüngzüktep ka agitsü mapang tatem leni arur, kechiaser Hezbollah maneni Hamas den sendaktepa lir," ta Gallant-i US envoy Amos Hochstein dang ashi.

Iba sülen Netanyahu-ia Hochstein dang Israel north tsütsü arütsülen security tensa melenshitsü meranger ta shia liasü.

Honibarnü Hezbollah deputy chief Naim Qassem-i par telok rarai aotsü tebilemba mali ta ashi saka Israel-i tenzükra anatsülen takoksa tulu alitsü ta shia liasü.

# Myanmar tzümetsüing lendong nung asür nisung 236 jungogo

**Yangon, Rongjui/September 17 (Agencies):** Typhoon Yagi ajanga Myanmar kübok tesem balala nung tzümetsüing adokdaksüba sülen tang tashi nung asür 236 bo jangjaogo.

Iba lendong nung nisung 77 tashi samara tang tashi bushidar, ta state meyong Global New Light of Myanmar-i Mongolbarnü sangdong ka ajanga metetdaksü.

United Nations Office for the Coordination of Humanitarian Affairs (OCHA)-i ashiba agi, lendong nung asür timba akümtsü imlar.

"Source balala ajanga nisung noklang aika asüba sayur aser ano nisung aika samara bushidar," ta OCHA-i Hombarnü sangdong ka ajanga ashiba den, tzümetsüing agi nisung 631,000 shi dak kongshir alitsü ta amanger, ta shisem.

Typhoon Yagi ya iba tesem nung taküm yipru aitba rongnung tesashitiba lir aser iba yirpu yagi taoba hopta southern China, Vietnam, Laos aser Myanmar dak kongshi aser iba ajanga item tesemtem nung tzünglu kanga sangshia arua liasü. Northern Vietnam nunga nisung noklang aika asüba osang sangdongogo.

Myanmar nung tzümetsüing agi linük yimtiba Naypyidaw densema state aser tzükong teku dak kongshio. Tzümetsüing agi kongshir aliba tesemtem rongnung central Mandalay, Kayah, Kayin aser Shan State nunger densema lir.

2021 küm February ita military-i sorkar atsungba sülen military aser telok balala raratepba ajanga nüburtem aika pei talidak ki toktsür jenshia or aliba mapang ka nung tang ano tzümetsüing agi kongshio.

Myanmar nung sorkar aser telungpur telok balala tsungda mangatettep adokba ajanga nisung million asem shi pei talidak ki toktsür jenshi or alitsü ta amanger, ta UN-i ashi.

General temi taoba mapangbo linük aser lokti tentet balalai teyari agütsüba magizük, kong 2023 küm May ita Cyclone Mocha-i western Rakhine State kongshiba mapang teyari agütsütsü atema asüngdangba magizükba densema lir. Ajisüaka hopta tatem military telokabai teyari meshia liasü, koba pai kanga bulua inyakba mapa ka masü.

OCHA-i ashiba agi, tang chiyongtsü, tajemtsü tzü, mozü,

süoshi aser tejenokdak nungdaker, saka lenmang aser aputem raksar aliba aser iba den telecommunication aser internet service tem meshidakba ajanga tekümzükba aser teyari agütsüba maparen benoka inyaksü tetsükdaksü adoker.

Special Advisory Council for Myanmar (SAC-M), koba international human rights experts tem indang independent telok ka lir parnoki ashiba agi, kidanger linüktemi nungdaka alirtem nem teyari agütsütsü asoshi resistance authorities aser lokti tentet balala den tongteprateptsü kanga tongtibang lir.

"Myanmar military junta ya Myanmar indang legitimate mesüra de facto sorkar masü mesüra parnok dak nungdaka alirtem nem teyari agütsütsü asoshi tejangraba mali aser tashia mali," ta SAC-M-i ashi.

"Myanmar nung tang mepetmesü adoker aliba ya military-i adokdaksüba lir aser parnoki parnok indang military aser yimden yimsüsüba tsütsü onok balala tejakdangi bener aotsü asoshi dang tang humanitarian crisis ya amshitsü."

# MENUNGRA BILEMTETER



18.09.2023

18.09.2024

**Asür Obangmar (Chuchuyimlang)**

Süngdong ka lensukra ano süngsem lanu atoka meyitsü teyimla lir, saka nisungbo süadoker aser samaa aor aser anüing ali mesüitem tashi mejangba mesaksü aser kidangi meshilangtsü ta anoki sashia metet, ajsaka na onok toktsür or küm ka abensadang na temeim aser terajem shisa tajung bilemtetdang onok rongjena azüngmeyaker. Saka na ochishiba, teindang, aser tongmelang taküm aliba shisadangtang onok temelong zürepba melongjang anisüngzükter.

*~ Temeim kinungtsü, chirnur, apang aser semchirtem.*

# AO RIJU SANGDONG


Ao Riju achaayanga agiba Arangtet Tatidang 2024 (Tanabubaren) shiyim Rongjui 20, 2024 anogo nungi tekübok agüja aliba tesemtem nungi angutsü. Iba den Arangtet Tenren dak sentakbaren nung temetetsü kar yamai sangdonger;

- Arangtet Tenren (Syllabus) nung temelenshi yamai alitsü;
  - Tang nungi Arangtet Certificate Tenren (ACT) malitsü saka Chiteni, 2024 tashi nung mezüing tatidang agütsür alirtembo Arangtet-502 tashi nung tembangtetsü.
  - PGDT Tenren atema Post Graduate (UGC recognized University) sür alirtem ajak PGDT nungi (direct) tenzüktsü, Tenren nung temelenshi mali.
- AT shiyim angutsü tesemtem;
  - Wb. Aotemjen Jamir : M/No. 8731821467 (Kohima)
  - Wb. P. Alem Jamir : M/No. 7005501457 (Dimapur)
  - Ao Riju office : M/No 9089816427 (Mokokchung)
- Shiyim agizükter ajaki Mongputeni 10, 2024 tashi nung Ao Riju office tongtsütsüla.

Sd/-  
(S. Wati Ozüküm)  
Secretary, Ao Riju

Sd/-  
(I. Temjen Tzudir)  
Publication Head

# Putin-i Russian sepai timba akumtsü totuyuba agütsü



**Moscow, Rongjui/Sept. 17 (Agencies):** Russia Tir Vladimir Putin-i linük mitkar dang alima nung China sülen Russian army timtiba kumdaksütsü mechi sepai tasen 180,000 anioксеma active servicemen 1.5 million kumdaksütsü totuyuba agütsü.

Sorkar indang website nung sangdongba totuyuba ya December 1 nungi mapa kuma inyaksü. Armed forces ajak agi nisung 2.38 million kumdaksütsü ta ashir.

International Institute for Strategic Studies (IISS) ajanga ashiba agi, iba ama züngsem timba kumdaksüba ajanga United States aser India dang Russia indang active combat soldier timba

akumtsü aser China sülen jenjang tanabuba nung alitsü. Beijing nung active duty service personnel ya million ana dak tema lir ta IISS ajanga ashir.

Iba totuyuba ya 2022 küm February ita nungi Putin-i tashi ajak amshia Ukraine amak tenzükba sülen mitkartem züngsem ulushiba tasemben buba alitsü aser Russian sepaitem Ukraine anüdokleni aodang aser Russia indang Kursk region nungi Ukraine sepaitem meindoktsü merangba mapang ka nung iba totuyuba ya agütsür.

June ita Putin-i Ukraine nung rarar sepai 700,000 jungnüa lir ta shia liasü.

*(Maneni tapak 8 nung...)*

# Mkg. nung Imchaba Master Memorial Open Volleyball Trophy 2024 asayadagi



Mkg. nung 17th Imchaba Master Memorial Open Volleyball Trophy 2024 tenzükba sentong nung Inaugural Patron SDO(C) Mokokchung Wb.Temsuchuba Jamir-i mezüngbuba Match asayartem den metetpela-a salem süa aoba mapang nung tangokba noksa.

**Mokokchung, September/ Rongjui 17 (TYO):** Mokokchung District Volleyball Association-i (MDVA) ayongzuka 17th Imchaba Master Memorial Open Volleyball Trophy 2024 tanü Multi-Purpose Sports Complex, Mokokchung nung tenzükogo.

Iba Trophy nung team ajak agi 19-i shilem agitsü aser September 17 nungi September 20 nü tashi Pool 4 lemsar asayatsü tatongi renema lir.

Tanü iba Trophy tenzükba sentong nung Inaugural Patron SDO(C) Mokokchung Wb. Temsuchuba Jamir-i jembidang Imchaba ya tashimeteter ka aser saisapong meimba nübo tajung ka liasü, Imchaba nüngtem nung iba ama asaya tetoktepba sentong ayonga

akaba asoshi tepelaba metetdakja ashi.

Iba Trophy 17 ben tashi iba trophy taküm lidakja timtem arema inyakba asoshi Inaugural Patron-isa Mokokchung District Volleyball Association-i nem tenungsang agüja liasü.

Saisapong ajanga nüburtem tsüngda nung tembar yimteptsü aser telongjem bener arutsü asoshi lenmang kanga dang mela mela lapoker, anungji iba tournament nung asayartem ajaki chichiba asayaba tanela asayaa iba asayamong nung asayaba ajanga kati ka den temba yimtepa telongjem yanglutsü merangang ta Inaugural Patron SDO(C) Mokokchung Wb.Temsuchuba Jamir-isa asayartem ayongzuka jembii.

Asayamong tenzükba sentong tatsüka agidang sentong tenzükba Tsüngrem dang nungi lenisüba jazüka MTBA Youth Mentor Chubawabang Lemdur-i sarasadem aser Trophy Planning Committee Convenor Imkongünep Kichu-i tarur pela agizüka jembiba den Pretty Tzüdir lenisüba nung sentong ketdangsüa ania liasü.

17th Imchaba Master Memorial Open Volleyball Trophy 2024 nung Champion Rs.100000, First Runners Up Rs.70000, Second Runners Up Rs.30000 aser Third Runners Up Rs.20000 agütsütsü aser ano iba den Best Spiker Rs.5000, Best Setter Rs.5000 aser Player of the tournament nem Rs.5000 ta agütsütsü renema lir.

# School of Football nungi asayar 5 Dynamic Sporting FC den sign süogo



(Tabelen nungi) Kimendi, Isheto Chishi, Nitova Swu, Lanunungkum, Talimoa ta School of Football Nagaland nungi U-15 tebur asayar 5 Dynamic Sporting FC Bangalore den sign süogo.

**Dimapur, Rongjui/ September 17 (TYO):** School of Football Nagaland nungi Nitova Swu, Talimoa aser Lanunungkum (U-13) Isheto Chishi aser Kimendi (U-15) ta asayar pongu Dynamic Sporting FC, Bangalore den tenanzüktepba yangluogo.

Asayar ponguprongla nem Dynamic Sporting FC-i scholarship agütsüogo aser parnok Double Pass Development League, The Amateur League, aser Karnataka State Football Association kübok tanga

Under-15 asayamongtem nung shilem agitsü.

Nagaland nungi asayartem ya iba Club nungi asayaba mapang tawa Blue Cubs Bangalore 2024 kokogo. Asayartem ya School of Football Nagaland tawabangba kübok ita aika training agia aruogo aser special goalkeeper training sessions ka James Kithan (I-league Player)-i agia liasü.

School of Football Nagaland ya Kivi Zhimomi-i (taoba I-league asayar) ngutetba independent football

academy ka lir aser iba School indang Managing Director ji Ason Chang Zhimomi lir. School ya Naga nung lanur football asayartem anitettsü atema inyaka arudar.

School of Football Nagaland aser Dynamic Sporting FC na longjemer asayartem nem training agütsütsü aser state adena orr temaba jenjang tonga asayatsü atema asayartem anitettsü nükjidong nung inyakdar. Club-isa, angati training session aser merchandised tem agütsütsü.

# 24buba NSF MM Trophy

- September 18 nü asayatem -

1. New Reserve Y.O. vs Nousi Riizhii (Colleges) @ 9:30 AM
2. Khrietho FC, Meriema vs Jalukie Town Y.O. @ 11:30 AM
3. Halcyon FC vs Kohima College, Kohima @ 1:30 PM.

# India-i Asian Champions Trophy 5benbuba kokogo

**Rongjui/September 17 (Agencies):** Mongolbarnü Asian Champions Trophy final nung India-i asayamong ayongzuka asayaba linük China goal 1-0 agi koka iba asayamong otsüsütsüsa pongubenbuba kokogo.

Iba asaya akoktsü atema India team kanga meranga asaya liasü, kechiyong China team-i parnoki akokba tashi tajungtiba asayaogo. Jugraj Singh shiba substitute asayar ka ama iba asaya nung shilem agia liasü, pai tatembangbuba quarter nung goal ka idakja India team nem takok agütsü. India nung nüngtugu asayartemi China goalkeeper Wang Weihao ajanga ball mezükoktsüti aliba mapang defender Jugraj-i goal ka ya idakja liasü.

Kasa mapang nung rank 23buba nung aliba China team-i India den kanga merang asayaogo, shirnok Asia nung temaba jenjang nung aliba team lir. China nung asayartemi quarter asem tashi defence kanga junga mena India nung asayartem nokdang. Iba asaya ya China team-i amokbanger asaya saka parnoki India defence adena ball bener melutet.

Mezüngbo China team tera anokshia liasü saka iba mapang India-i maongka magitet. Kasa

mapang nung China nung pusemertemi Harmanpreet Singh-i aniba team nem pressure agütsü kechiyong fan tema aika iba asaya reprangi arua liasü. Ajisüaka mapa süia aoba den China team-i kanga junga asaya tenzük saka parnoki India nung asayartem adena ball bener lur goal midaktsüti liasü.

Asaya nung India atema mezüngbuba Sumit-i minute 6buba nung target nung shot asü saka Wang Weihao-i kanga junga nokdang. India nem mezüngbuba penalty corner ya minute 10buba nung agütsü saka Harmanpreet Singh-i China nung defence aden ball meyoktet aser China nung defender tetsüng nung ondak. Iba sülen ano penalty corner ka angu saka India team captain yagi goal adena ball züktok.

Team ana tsüngda goal idaktsütsü asoshi kati ka kanga nongshitepa asayaba sülen asaya atemtsü minute 9.34 anunga lia Jugraj Singh-i India atema goal ka idakja liasü.

Asaya tatem China team-i iba goal küptoktsü atema kanga meranga asaya saka parnoki India nung defender tem majangteti asaya goal ka yagi makok aser India team-i iba asayamong pongubenbuba koka liasü.

# BENDANGLI OSANG : Tapak 7 nungi...

## Putin-i Russian sepai timba akumtsü...

2022 küm tatemlen Ukraine-i meyiper amakba mapang reservists 300,000 jaokba sülen taa tajung agi mesüzükba voluntary soldiers dak Russia metaloka liasü.

Carnegie Endowment for International Peace think tank nung Russian mitkar tsütsü takotet Dara Massicot-i active servicemen timba kumdaktsüba yaritsü Moscow renema lir na ta asüngdanga liasü.

“Sepai million 1.5 yaritsü atema lenmangtem lir, saka tang nübu tasen shimoktsü tuyuba ama inyaktetra, parnoki nüngdakba peritsü asoshi defense budget tali kumdaktsütsü nüngdaktsü,” ta Massicot-i ashi.

Iba ama nükjidong atongtsü atema Moscow-i telemtetba tasak kar agitsü mesüra tetsür tali military nung inyaktsü atema ozüng melenshitsü akok,

ta Massicot-i ashi.

“Ibai dangar tsübodaktsütsü atema inyakba asü shidakba nung sepai züngsem tali kumdaktsütsü atema inyakerar repranga atatsüla. Tang aliba volunteer yimya ya junger saka tashi tembanger. Züngsem tali kumdaktsüba ajanga senotsü tali indoktsü,” ta lai ashi.

2022 küm rara daki yokba nungi jenbutsü mechi nisung meyririjang aika linük yutsür jena aoba ama mataloktsü mechi Kremlin-i reservist tem jaoktsü nungnanga arur, ta aikati ashir.

Russia indang nütsüng yongsük ya Ukraine indang nütsüng yongsük dang asemsü agi timba liaka tongpang nung Kyiv sepai ama takoksa tulu ajurua arur.

Ajisüaka asangsang nung par sepai asüba ya miimshir.

# BILEMDANGANG

“Nai nüsasa dak tamang katetra mapa ajak koktettsü lenmang lir.”